

Bondia. Ha'u nia respeitus ba:

- 1) Majór Jenerál Lere, Xefe Estadu Maiór Jenerál F-FDTL
- 2) Embaixadór Roberts no Majór Jenerál Ellwood
- 3) Kolonel Yoichiro Rokutan, Xefe Kooperasaun Internasionál ba Seguransa
- 4) Kolonel Burnside, Enkaregadu ba Asuntus Sudeste Aziátiku husi Komando Indo-Pasífiku Estados Unidus Amérika

Distintus konvidadus; no partisipante-sira iha HARI'I HAMUTUK TINAN RIHUN RUA SANULU RESIN SIA (2019)

Ha'u mós hakarak felisita Tenente Kolonel Armindo no Tenente Kolonel Haksolok tanba asumi ona komando iha ita-boot sira-nia komponentes, parabens ba ita-boot-sira.

Lori Estados Unidus Amérika nia naran, ha'u sente orgullu mai hamutuk ho ita-boot-sira ohin hodi selebra aniversáriu badala hitu (7th) husi Ezersísium Harii Hamutuk. Ezersísium multinasionál ne'e halibur F-FDTL, Estados Unidus Amérika nia Mariñas, Navál Seabees, Forsa Defeza Australiana, no Forsas Auto-Defeza Japoneza.

Tinan ne'e, HARI'I HAMUTUK inklui ona membrus militáres atus rua (200) serbisu hamutuk durante fulan ida hodi treina no kolabora iha projetus enjeñarias konstrusaun no kombate. Sira mós halao interkámbiu lubuk-ida kona-ba asuntus téknikus espesializadus.

Ohin dadeer, partisipante-sira iha Harii Hamutuk inagura ona kaza-de-bañu foun ida iha Eskola Otelaria no Turizmu Becora. Membru-sira husi ezersísium ne'e, kompleta mós obra Kompleksu Fatin Tiru no Refeitóriu ida iha Baze Militar Metinaro. F-FDTL, hanesan mós ho membru comunidade lokál-sira, sei hetan benefísiu boot husi ita-boot sira-nia servisu makaas ne'e.

Ha'u mós sente orgullu katak seksaun integradu lima ne'e, ida-idak lidera husi kada nasaun no kada komponente. Ita sai forte liutan bainhira ita integradu no bainhira ita pratika ábitus kooperasaun atu nune'e iha kualkér oras bainhira presiza, ita hatene ona oinsá serbisu-hamutuk.

Importante mós katak nasoens haat iha HARI'I HAMUTUK representa nasoens demokrátikas forte sira iha rejiaun Indo-Pasífiku. Ita-nia militar sira-nia servisu ho sidadaun Timor-Leste sira hatudu oinsá forsas defeza iha demokrasia halao servisu ba povu no oinsá sira komporta tuir normas demokrátikas. Iha Harii Hamutuk, ita

aprende ona ba malu, fornese apoiu ba povu Timor-Leste, no harii ona lasus amizades no kooperasaun ne'ebé dura ba tempu naruk.

Ne'e momentu importante ida ba Timor-Leste no ba kontribuisaun comunidade internasionál ba nia independénsia no desenvolvimentu demokrátiku. Semana balun liubá, ita hamutuk ho Timor-Leste selebra aniversáriu Referendu Popular ba dala 20.

Aban, ita sei selebra Aniversáriu INTERFET ba Dala Ruanulu. Estados Unidos Amérika ho orgullu partisipa ona iha operasaun ne'e. Durante operasaun refere, Estados Unidos Amérika fornese membrus militares hamutuk rihun lima (5,000), ró hitu (7), no aviaun atus ida (100) hodi restabelese seguransa no ajuda esforsu-sira ba rekonstrusaun. Hafoin tinan ruanulu, espíritu kooperasaun internasionál hanesan kontinua nafatin, iha Harii Hamutuk no ezersísio multinasionál konjuntu seluk iha Timor-Leste.

Parabéns ba Timor-Leste nia militár no povu Timor-Leste no obrigada no parabéns ba participante-sira hotu iha Harii Hamutuk.

Ha'u dezeja ba imi hotu kontinuasaun susesu iha futuru. Obrigada!